



Au 's Sägg's-Tage-Renne z' Ziri hett e Dopingfall erläbt
Dert syge si bim Brinze fascht im sibte Himmel gschwäbt
E Meter hinder em Pissoir mien si stoo zem urinierere
Mit Viagra kasch bim Steherrenne jede Bryys garniere

Bi dr Visana hänn die iber fuffzig iberhaupt kai Brot
Die Glunggi dänge so bikäme si d'Finanze no ins Lot
Mir mainte, dass die zerscht in Ziri miesste go abdangge
dert het d'SVP e Kollektiv mit birewaiche Grangge

D'Bahamas-Ferie vom Herr Rey sin z'Änd — äär sitzt im Loch
Au dr Raffi Hueber isch jetz zrug und schafft als Gfängniskoch
Dr schlai Klages muess nit yne — und duet sich e Job arysse
Er hilft em FCB mit dyyre Byylje alli Lyt go bschysse

's Millenium kunn, d'Komete räägne, d'Vulkän die bräche uff
Dr Euro macht bald d'Schwyz kabutt und d'Umwält die goht druff
No schlimmer fir die ganzi Wält isch ainzig und elai
Dass z'Laufe hinge alli Dögg'tis mitenanger Lämpe hei

Dr Ali sait zem Mustafa: «Balcab, das isch doch Dreck.
Hütt hani yschaite und Turkisch Staatsfernseh isch weg.»
Mir schlön vor lueget doch SF2 denn sinn ir integriert
Will em NightMoor syni Witz sogar uff Dytsch kai Sau kapiert

Dr Wooghof isch zwai Joor alt und es isch e grosse Bau
Es hett dert sehr vyl Blatz und trotzdäm sin sy scho im Stau
No 20 Zälle meh hätsch baue miesse — das wurd sich jetz lohne
Will gwissi Staatawält statt amme haim go miesste dert go wohne

Im Ciba-Logo duet e Schmäterling scheen Peschtizid kaschiere
Drey Schlissel schliesse d'Diire — nur die Grosse profitiere
Fir 's Olympisch Komitee hänn mit e Logo ney kreiert
Statt fünf Ring isch 's nur e hohli Hand wo Schmilrgäld ykasiiert

My Schätzli sait du muesch jetz abnäh — du bisch fett und drall
Do git's doch jetz e Mitteli mit Nämme Xenical
Das nutzt au zimmilig gschwind — und scho bin ych denn wider fit
Aber e Beauty-Pille fir my Alti wär dr greesser Hit

E Färnesehändig hett am Sunntig Obe bsundri Gescht
D'Martinetti, 's Ruthli Dreyfuess und 's von Felten gänn dert 's bescht
D'Verona Feldbusch laift denn «Peep» —
und scho wird hitzig diskutiert
Zum Thema: Worum wird in XXL kai Raizwösch produziert?

Worum wird 's Ganthuus fir Millione umbaut und saniert
Die Hitte isch doch guet eso und bis jetz rentiert
No e Vorhang und e Byyljekasse — sunscht ka 's wyterlaufe
Und kasch wie vorhär dert de Lyt e Huffe Misch und Schund verkaufe

Bänggle isch e glatti Sach
miir BSG-ler sin vom Fach
Kumm doch bi uns go yynegnaisse
mer dien Dy gäärn willkomme haisse